

# GOV-HER-NANCE

“Gov-her-nance” बुलेटिन, धनगढी उप-महानगरपालिकाक कैंयो समुदायमसे सिमवाटल हल्ला, नागरिक हुकनक जिज्ञासा ओ प्रश्न सिमोटक तथ्य पता लगाक, सक्कु नागरिक हुकन सूचित कर्ना काम कर्ता । हम्न यी बुलेटिनके माध्यमसे महिला (जन्निनक) ओ लैङ्गिक अल्पसंख्यकक मुदाहन बाहेर लावक उपमहानगरवासी ओ उपमहानगरपालिकाबीचम रहल सूचनक दूरी कम कराक लैङ्गिकमैत्री उपमहानगरके अवधारणह पूरा कर्ना लक्ष्य लेल बाटी ।



घरक कामसँगे छावाहे पढैटी धनगढी उप-महानगरपालिकाके स्थानीय जन्नि (महिला)

तस्वीर : पुष्पा ओम्का भट्ट

## लैङ्गिक हिंसाह प्रभावकारी ओ मजासे सम्बोधन करक लाग “एकद्वार संकट व्यवस्थापन केन्द्र”

एकद्वार संकट व्यवस्थापन केन्द्र असिन स्यावा डेठा

- लैङ्गिक हिंसाम परल जन्निन् ओ लर्कन् स्वास्थ्य स्यावा
- मनोसामाजिक परामर्श
- अल्पकालीन आश्रय
- कानुनी परामर्श
- चिकित्सासे प्रमाण सिमोटना
- आवश्यक सुरक्षा व्यवस्था
- परिवार या समुदायम पुनर्स्थापना
- जीविकोपार्जन हुइसेवना कामम सहयोग



असिन केन्द्र हिंसाम परल मनैन् चौबिस घण्टा बिनरुप्यक (निःशुल्क) स्यावा कर्त । इ केन्द्र हँक हिंसाम परल मनैन् ओ हेरुइयन् अभिभावकके लाग सैना, लगेना व्यवस्था कर्त, हेरुयन् निरहलम कुरुवाके व्यवस्था फे कर्त । इ स्यावाबाहेक हिंसाम परुइयन्के बिर्वा कराइक लाग और अस्पतालम रिफर कराइ पर्लसे, रिफर कराइबेर चाहना गाडि भारा, खाना खर्च, लर्कन्से लेक एकजन अभिभावकके गारी भारा ओ सैना खर्च फे बेहोर्त । धनगढीम “एकद्वार संकट व्यवस्थापन केन्द्र” सेती अस्पतालम खुलल् बा ।

स्रोत : अस्पतालमा आधारीत एकद्वार सङ्कट व्यवस्थापन केन्द्र सञ्चालन मार्गदर्शन

# हल्ला ओ तथ्य

सरकार सुत्केरीहुकन  
डन्डुर भवाला डेहट हुँ, उ  
डन्डुर भवाला कलक  
का हो ?



डन्डुर भवाला कलक नवजात शिशुनक लाग २ ठो टोपी, २ ठो मोटो, २ ठो दाउरा, एकठो न्यापर, एकपाँजर प्लास्टिक ओ औरपाँजर फलाटिन लुगा रहल “बेबी म्याट” ओ डाइक् लाग एकठो म्याक्सी ढरल भवाला हो । डन्डुर भवालक लाग सरकार हिमाली जिल्लक अस्पतालम रु. १०००, तराई ओ पहाडी जिल्लक अस्पतालम रु.९०० के दरले बजेट अलगाइल रहठ ।

श्रोत : [https://moHP.gov.np/images/karyakram\\_sanchalan\\_staniya.PDF](https://moHP.gov.np/images/karyakram_sanchalan_staniya.PDF)


सरकार स्कूल, छाउपडी प्रथासे प्रभावित लवन्डिन् (बालिका) ओ जन्निन्, समुदाय (धामी, भाँक्री, पण्डित, मुखिया आदि), परिवारके किसन्वा ओ और सदस्य, ओस्टहक राजनीतिक दलहुकन प्राथमिकताम ढैक छाउपडी ओराइक् लाग अल्पकालीन ओ दीर्घकालीन कार्यक्रम तयार कर्ल बा । ओस्टहक छाउपडी प्रथाके अन्त्य करुइया मनै, परिवार ओ समुदायह सम्मान कर्ना कार्यक्रम फे बा । दीर्घकालीन रूपम जन्निन्के सहभागिता सुनिश्चित करक लाग हुँकनके सक्कु विकास कर्ना, कानुनी व्यवस्थासे जन्निन्के मानव अधिकार सुनिश्चित कर्ना कार्यक्रम फे सरकार आघ सर्ल बा ।

छाउपडी प्रथा हटैना कैक  
संघसंस्था केल आघ  
आइल डेखपरठ । का  
सरकार कुछु नि करठ ?



श्रोत: <http://mowcsc.gov.np/uploads/uploads/5XJJPFzcr1qO9Wk6w1ENIEti2gfVBk2iqGZzH59e.pdf>

दाइजो प्रथाह गैरकानुनी  
मानजाइठ । लेकिन,  
अभिन फे इ प्रथा  
निओराइठे । याकर लाग  
कानुनी सजाय का बा ?



आपन परम्पराअनुसार सामान्य उपहार, मँटी, दक्षिणा या शरीरम घालल् गहनाबाहेक भवाज कर्ना इल्हा या इल्हिक ओर्से कौनो किसिमके चल, अचल सम्पति माग कैक या लेनदेनके सर्त ढैक भवाज कर्ना या करैना कामह गैरकानुनी मानजाइठ । असिन कर्लसे तीन वर्षसम कैद या तीस हजार रुपयासम जरिवाना या इनु सजाय हुइना व्यवस्था बा । भवाज कैक सेक्कफे दाइजो मँगुइयन या दाइजोक् कारणसे जन्निन् या हुँकनके नाँटपाँटन सँटैलसे, गलत व्यवहार कर्लसे सँटुइयन् ५ वर्षसम कैद वा ५० हजार रुपयासम जरिवाना या इनु हुइना व्यवस्था बा । कौनो सम्पति लिहल ठहर्लसे ओसिन सम्पति फे सम्बन्धित मनैन् फिर्ता करपरठ ।

श्रोत : अपराध ऐन





धनगढी उपमहानगरपालिका वडा नम्बर ११ घोडसुवाम बैठना सुन्दरी रानाक ठर्वा ५ वर्षआघ कौनो बेराम निपर्ल रलह । एकदिन एकचोट्ट बेहोस हुइल । ४ दिनपाछ कोहलपुरसे भारत लैजिटि-लैजिटि डिग्राम ओरागैल/मुगैल । टबसे सुन्दरी अक्कलहे जीवन कटाइति । ठर्वा ओरैलक ४ वर्षसम ३ माउ, ससुर्वा,

बर्जन, जेठिन्यक्सड बैठलि । लेकिन, उ बसाइ हुँकाहार लाग बहुत साँसट ओ हैरान हुइलिन् । रानाथारु समुदायके परम्पराअनुसार जेठिन्या बहोर्यनके एक-एक महिनाम भन्सा कर्ना पाल्या रठिन् । ओकर लाग हुँकहिन भन्सा कर्ना सामान न्वान, टचाल, टिनाटावन, मिलम धान कुटैना रुप्या फे निडिहँट । भन् हुँकाहार छावह पढैना ओ लगैना खर्च डेना ट डुरके बाट हो ।

सुन्दरीक लैहेर धनी रलकओसे हुकहिन् कुछ दिन साहारा मिल्लिन् । ज्या कामके लाग फे हुँकार डाइ खर्च जुटाडिहिन् । आपन परिवारम ट विभेद पलि रलहिन्, समाजफे ओस्टह व्यवहार कर्लिन् । पैलह हुँकहिनसे बरा मिलनाहा मनैफे डुर होगैल । हुँकहिनसे नेड्नाफे मन निकरँट । केकोसड बजार गैलसेफे हुकनके ठर्वा, ससुर्वन् रिसाजैठ । किहुसे काम परलम फोन कर्लसे हुँकाहार बर्जन शंका कर्ठिन् ओ गर्यइठिन् । ठर्वा रहलम इह समाजके मनैन्के बोलीचाली सभ्य रहिन् । लेकिन ठर्वा निरहलम समाज “विधवा ट हो, डिउर दिन कहाँ रहि, और ठर्वा लेक भाग ट जाइ काहुँ” कैक निमजा व्यवहार कर्ठिन् ।

परिवारम बैठना वातावरण निमिल्क सुन्दरी आजकाल अक्कलहे बेठि । अल्ग हुइबेर बर्जन कच्ची घर बनाइक लाग कठ्वाफे निडेलिन् । इ विषयमा समाजके मनै बाट बट्वाडेलिन ट कुछ कठ्क् व्यवस्था कैडेलिन्, बर्जन । एकल महिलाह अंश डेहबेर समाज अभिनफे चाल निकरठ । सम्पतिक अधिकारसे हुँकहन् डुर करैलसे और अधिकार फे डिहनिपरि कना सोच अभिनफे पलि बा । इ फे हुँकहक अधिकारके लडाइँह कमजोर बनाडेल बा । असिन ब्यालाम जठिनन्ह आघ बर्हाइक लाग जिठमेवार निकायके भूमिका महत्वपूर्ण बा ।

“

हुँकाहार ठर्वा रहलम इह समाजके मनैन्के बोलीचाली सभ्य रलहिन् । लेकिन, ठर्वा निरहलम ओह समाज “विधवा ट हो, डिउर दिन कहाँ रहि, और ठर्वा लेक भाग ट जाइ काहुँ” कैक निमजा व्यवहार कर्ठ ।

”



# समुदायके प्रतिनिधी आवाज



## राजकुमारी राना

स्थानीय महिला,

धनगढी उपमहानगरपालिका, वडा नं. ११

मै एकठो निरक्षर महिला हुइँ । टबमार मति इ समाजम किउ निचिहिन्ठ । घर चलाइक लाग बारिम काम कैक टिनाटावन बेचुँ । टिनाटावन बेचक छाइछावन पहैना खर्च पुगठ । लेकिन, निपहर्लक ओर्से मजासे हिसाब किताब निजावक टिना बेचक रुप्या फिर्ता करबेर अक्मकैँ । आजकाल निपहर्क पाछ पर्नु कि कनाअसक लागठ ।

मै पहल रटुँ कलसे, और ज्यादा प्रगति कैरखु कनाअसक लागठ । म्वा जसिन बहुत जन्निन् अस्टह समस्या भ्वागठुइहि कनाअसक लागठ । टब आब छाइन् आत्मनिर्भर बनाइक लाग शिक्षा डिह पर्ना बहुत जरुरी बा ।



## तुलसीदेवी साकी

स्थानीय महिला,

धनगढी उपमहानगरपालिका, वडा नं. ६

मै ६० वर्षक हुइनु । म्वा जिन्गी बहुत दुःखम बिटल । हम्र ५ दिदीबहिन्या बाटि । हमार डाडुभाइ निहुइल । टबमार बाबा डाइह नरसे दुःख डिहँट । इ हमन मानसिक रूपमा कमजोर बनाए । भ्वाजपाछ दैनिक गुजारा करक लाग बहुत दुःख कर परल । छाइछावाफे जर्मल । छाइन्के भ्वाज होस्याकल । छावन् घर फुट्क अलग बैठ । यी उमेरम म्वासँग किउ निहुइट । ठर्वाफे ओरागैल । सरकारके डिहल भताले गुजारा चलाइ परटा । भताले केल दैनिकी गुजर्ना निपुगठ । म्वाठे और उपायफे निहो । कबुकबु गोन्द्री बिन्क बेचुँ । डानडान रुप्या आइठ । उमेरम ना पहर्क सीप सिक्किल ना ट बुहाइलम रुप्या जमा कर सेक्किल । और जहनके साहारम जिअपर्लसे बुर्हाइलम बरा दुःख हुइना ठहरल ।







## DISCLAIMER

यी अंकमा सिमेट्रिअल जानकारी समुदायम काम कर्ति रहल स्वयंसेवक, अनलाइन माध्यमसे लेहल आधिकारिक स्रोत, सरकारी कार्यालय ओ अकाउन्टबिलिटी ल्याब नेपालके फेलोसिमअन्तर्गत काम कर्ति रहल महिला समूहके कैयौठे मनैनसे प्रत्यक्ष ओ अप्रत्यक्ष रूपमा बट्वाक तयार कैगिल हो । विषयके महत्व, सान्दर्भिकता ओ धनगढी उपमहानगरपालिकाम पारसेवना सकारात्मक प्रभावह ध्यान डेक यी विषयवस्तु छान्गिल बा । यी अंकमा सिमेट्रिअल जानकारी बुलेटिन प्रकाशित हुइल मितिसम् सत्य बा ।

“Gov-her-nance” अकाउन्टबिलिटी ल्याब नेपालले धनगढी उपमहानगरपालिकासँगको सहकार्य र CFLI को सहयोगमा तयार गरिएको हो ।